

1511 bus dono singulis data sunt : quæ jugera hæredes ipsorum sequantur.

*Rhodigium
ad Venetos
redit.*

A Rhodigianis autem oratores Patavium ad legatos missi venerunt, qui dicerent, omnes Alfonsi equites & milites Padum trajecisse, eaque loca reliquisse: itaque redire se ad rempublicam cupere: rogare, ut qui præsit, in oppidum mittant. quamobrem Valerius Marcellus, quem Patres magistratum Rhodigianis antea creaverant, eratque tunc Patavii, legatorum jussu eo se contulit. Romæ vero ante diem nonum calendarum novembris in publico Cardinalium collegio Julius Hispanis duobus & Gallis totidem, qui concilium Pisanum coegerant, Cardinalatum, quo in ordine erant, abrogavit. In urbe prætor est Vicetinis Franciscus Falerius datus: & qui plerisque municipiis paucorum dierum spatio sponte se reipublicæ reditibus præessent, lecti: & qui antea lecti erant, ad suos magistratus obeundos ire jussi. Utinunque receptum est. Octavianus autem Fregosius magnæ virtutis adolescens, qui cum Balione venerat, & Janes ex eadem familia, de quo sæpe dictum est, Julii rogatu, Januensium statum renovare magnopere cupientis, Senatu concedente Romam ad illum profecti sunt. Troilus vero Sabellus ob avaritiam (suorum enim equitum stipendia fraudabat, eaque de causa nihil illis negabat, atque illi indigna omnia patrare non verebantur) cum sui muneris tempus explevisset, a Senatu est dimissus. atque ob pecuniæ indigentiam omnes pensiones solutionesque a republica fieri solitæ, ab idibus novembris usque ad calendas martias, ab eodem Senatu suspensæ ac retentæ sunt. Quoniam autem propter res ad usum & mercaturam civium non recte ab Aegyptiis administratas, ad Alexandrinorum regem, quem *Soldanum* appellabant, erat mittendus, qui civitatis causam reipublicæ nomine tueretur: Patres legem sciverunt, ut legatus ad id munus crearetur obeundum etiam ex iis, qui in magistratu essent, eique e communi mercatorum pecunia auri libræ X. in præsentia darentur; salarii vero nomine in menses singulos ternæ libræ, cum navi-